

續

藏

書

續藏書卷三目錄

開國功臣

中山武寧王魏國徐公

洪武十八年二月卒
年五十四

開平忠武王鄂國常公

洪武二年卒年四十

岐陽武靖王曹國李公

洪武十七年卒年四十六

黔寧昭靖王西平侯沐

洪武二十四年卒年四十八

寧河武順王衛國鄧公

洪武十年卒年四十一

東甌襄武王信國湯公

洪武二十八年卒年七十

文成劉誠意公

別見名臣

續藏書卷三目錄

續藏書卷三

開國功臣

中山武寧王魏國徐公

不但
功第

一才

真德

皆然

第一

中山王徐達者鳳陽人爲人長身高顴赤色沈毅剛
決儕伍咸莊憚之時郭子興據濠梁稱滁陽王而

太祖爲其部帥用事達仗劔往從從略定遠張家堡

得兵三千人又從襲橫澗山寨得兵二萬人時年二

十二所委使必効而又時時以王霸之略進帝大

悅曰此國器也授鎮撫裨位諸宿將上尋從破元兵

於滁州澗，再從取和陽，拒殲其援師，皆有功而賊帥孫德崖來與子興合，已復有隙，軍且鬩。帝馳單騎往撫，爲所執，而子興前已誘執德崖，於是達請以身之德崖軍代，曰：歸我朱公子，我亦歸而孫帥。帝始得脫，達亦得脫，會滁陽王死，帝爲大帥，達益重。從下俞通海等水寨，與蠻子海牙相距，達別率精兵數千，取溧陽、溧水二城，斷其肘，故諸軍前薄，大破蠻子海牙，從渡江，拔采石，擣太平，與常遇春皆爲軍鋒冠，而達獨叅預密謀，進止尋從，破擒元將陳桡，先復大

破蠻子海牙乘勝下集慶路。帝稱吳國公欲將達而少之。乃會諸將陽責達等以不能戡下。召軍正使定罪。達等頓首請死。乃已。而命達率諸將攻鎮江。走苗帥完者。僂平章定定號令明肅。城中不知有兵。達自是專爲將矣。置淮興翼元帥府於鎮江。達領之。時張士誠王平江。誘我降將陳保二。發舟師自常州來逼。達禦之。敗其軍於龍潭。追奔至常州。請益師。上以兵三萬益達。達乃分其軍爲三。薄常州而壘。士誠之弟士德以卒數萬來援。達與諸將計曰。士德勇

冠軍且狡未易力勝也。去城十八里爲三覆以待。而別選鐵騎屬總管王均用將之。乃前徼士德兵。旣交均用鐵騎衝其中堅。陣亂。士德走。遇覆馬蹶。獲之。遂大破其軍。殺鹵以萬計。進圍常州。不下。帝乃故奪鼓、舞、元帥達以下一官。而賜書曰。虐降失陳保二老師。狐、城吾所以重過將軍也。將軍勉思補前過。大善不者。、三尺不貸。汝因復益以精兵二萬。達乃合四營兵爲二。以相救。而外營常遇春來應。夾攻破之。凡五月而常州下。達別將輕兵取馬馱沙。以爲靖江縣。進攻寧

國府破走其將謝國璽寧國守臣楊仲英等堅守不下帝以大兵繼之而仲英降復以輕兵徇宜興繇別道下常熟距平江不百里而軍平江大震已復與平章邵榮圍宜興分兵塞太湖口援道絕宜興下時帝以重兵定婺處將略有浙東諸郡而陳友諒之大將趙普勝以兵陷池州復進據縱陽水寨數往來窺伺帝念不及援達遣其將選精卒襲敗之普勝棄舟走復追擒其部將獲艨艟數百遂復池州捷聞帝大悅謂微達何以紓我內顧超拜奉國正將軍同

知樞密院事亡何。帝取無爲州。達以兵自無爲夜掩浮山寨破趙普勝之別將胡總管於青山窮追至潛山復破斬友諒之郭參政下潛山達還填池州。帝謀知友諒且犯池命僉樞密院常遇春以兵來助使使語達友諒旦夕至則設伏九華山下而掩其後可盡取也達乃與遇春筴選卒萬人伏九華友諒至盡銳攻城城中伐鼓大噪伏盡發城中應之遂大破其衆斬首萬餘級生獲三千人遇春曰此勳敵也不殺爲後害達不可以狀聞。帝報使者天下戰方始。

母多殺多殺是逆距之也而遇春則以夜阬其十之九上不懌命悉縱其三百人歸友諒而曰此吾不壹將之故也達自是專爲大將矣友諒旣陷我太平遂盛兵壓建康帝設奇大破之達時將南門外兵功最多遂與馮國勝等追及於慈湖縱火焚其舟至采石復躡其黑旗軍復太平遂取安慶尋從帝取江州友諒走追破之別將兵屯漢江之沌口遏沔陽戰艦進中書省右丞洪都降將祝宗康泰反大帥鄧愈走達以沌口軍還討定之宗走死檻泰送建康達

遂移兵圍廬州。時友諒失洪都而憤，悉其衆來爭樓船，高數丈，圍數百重。帝亦悉師溯流逆之，趣召達。自廬來會，與友諒遇於鄱陽湖。達先諸將蕩其前茅，殺千五百人，獲一巨舟而還。軍威振，旣而達舟深入中敵，火撲之，更進戰，復破敵而退。時友諒兵盛，帆檣後先不見際。帝謂左右：「卽不利，奈彼乘勝何？」旣而曰：「得之矣，吾以達留守，緩急可百全也。」夜以兵符授達，飛舸還建康。達至，申約束，嚴斥堠，鎮靜若無外兵者。而帝則已破誅友諒還矣。師還，卽吳王位。

而達爲左相國拜日。上召而諭以元政之。所以失。且用怠終爲戒。達等頓首謝。復從平武昌。還復諭達等。以更涉世故。則智明。久歷患難。則慮周。亡何率兵討廬州左君弼。君弼走安豐。遂取廬州。乃率兵徇友諒屬城之在荆湘湖南北者。而湖湘悉平。召還大會師建康。計所討。率常遇春等。以水陸兵徃狗士誠。淮東郡邑首克。泰州遂降。興化會士誠犯宜興。乃以都督馮國勝攻圍高郵。常遇春攻淮安。別將守泰州。而身率中軍精卒。渡江。走宜興。破擒士誠。兵解宜興。

圍國勝中高郵守將詭約降使使入受之皆見殺上怒撻國勝而趣達移兵會攻克之復移師會常遇春攻淮安破其左丞徐義兵於馬騾港進薄其城守將梅思祖降元將樞密同知陸聚亦舉徐宿二州來歸唯安豐爲元守達進師取之走其右丞忻都左君弼與其援將竹貞元相擴廓帖木兒遣兵救徐州達復大破斬之淮南北悉平帝乃與諸將相謀討士誠右相國善長以士誠兵尚強且饒蓄積宜少緩達持不可曰張氏汰而苛其大將李伯昇輩積子女玉

帛旦夕入耳用事者黃蔡葉三叅軍白面書生易與也臣奉上威德以大兵感之當自潰上大悅以左相國達爲大將軍平章軍國重事遇春爲副將軍率師二十萬討士誠禡於龍江進達等諭以母虜掠母殺僂母發丘壠母毀廬舍又戒之曰士誠能以吳歸命者必全之吾聞其母葬閭闔之外墟母據而芻牧也不感劫時副將軍遇春欲徑擣平江上曰不然賊分其衆駐吳興錢塘以自輔我頓兵堅城不克而招二輔之援非計也先攻吳興妙便乃悉舟師自太湖趨薄

吳興士誠之右丞張天騏、叅政黃寶、院判陶子實分道出戰。達亦分兵應之，而遣驍將王國寶以長槍軍扼其歸。黃寶等敗走，遇春扼之，遂圍其城。五太子及其平章朱暹、僉樞密呂珍來援，屯城東舊館。達遣遇春等爲十壘，復敗右丞潘元紹兵，而士誠自以兵來援。達逆戰，大敗走士誠，復破獲其同僉徐志堅。復破潘元紹之赤龍舡於平望，鹵其軍資甲仗皆盡。復大破舊館之援兵，五太子及朱暹、呂珍、左丞張天麒等降。李伯珍亦降。吳興下，遂下吳江州。從太湖西出平

江城南七里，破鮎魚口山柵，復敗其兵於尹山橋。遂
悉水陸兵薄平江，達營葑門，分兵營婁胥閭盤諸門。
築長圍，架木塔，與城中浮屠等別築臺三成，曰敵樓。
下瞰城中，纖悉皆見。尋使使之建康請事。帝賜璽
書勞之，曰：將軍自昔相從，忠義天性，沈毅有謀，端重
且武，用能過絕。亂略消弭，羣雄今事事稟命。將軍之
忠，吾甚嘉之。然將在外，君不御也。自後軍中緩急，將
軍便宜行之，勿以聞。平江城堅難卒拔，莫天祐時爲
士誠守，無錫更相唇齒。其將楊茂善泗數從水中爲

偵達獲茂釋而厚賞之使往來爲間因盡得其虛實
士誠迫自出兵戰馬驚墮水輿入城其弟士信張幕
城上踞銀椅進秋桃猶未及嘗而飛礮已碎其首矣
士誠氣益奪達知城中困乃勵士鼓而破葑門遇春
亦破閭門新寨其樞密唐傑等皆降遂大潰士誠收
其餘兵三萬巷戰復潰馳歸拒門自縊久乃蘇檻送
建康卒以縊死達之將破城也與遇春約曰師入吾
營而左公營而右將士人予一牌曰掠民財者死毀
民居者死離營二十里者死師入而民不知有兵食

寢互市如故。竊相咎曰：奈何久抗王師？達乃遣輕兵渡江下通州，歸獻俘於戟門，進封信國公，賜綺帛。爲右丞相，亡何議北伐。平章遇春請直擣元都，執辱主以臨天下。帝曰：壯哉！而昔所畫下平江策也。吾欲先取山東，撤其屏蔽，旋掩河南，斷羽翼，拔潼關而守之。天下形勢入我掌握，不待應牧野而元都下矣。鼓行而西，雲中九原以逮關隴，可席捲也。達曰：上策之善。於是信國公達爲征虜大將軍，鄂國公遇春副之。禡於北門七里山，大會諸將，謂諸將軍非不健鬪。

然能持重師有紀律戰勝攻取得爲將之體者毋如
大將軍達又謂達閩外之寄汝實任之茲行進取必
自山東始大將軍至淮諭沂州帥王宣與其子信業
請降旣而叛襲走我使臣徐唐臣等達怒急攻下沂
州修宣與其叛黨十餘人王信走帝勞大將軍達
賜書曰將軍今何嚮嚮益都則必以兵扼黃河斷其
援卽不嚮益都西取濟南濟寧二郡便兵難踰度其
在將軍金火二星會於丑分後火逐金踰齊魯以時
進取毋失達遂率兵攻圍益都降其平章老孫達河

州、擣直沽、據之作浮橋以濟師、丞相也、速不戰走、元都大震、抵河西務、敗其平章俺克等、遂進抵通州、與遇春夾河而軍、遼軍東岸、遇春軍西岸、遇春敗其西岸兵、擒國公卜顏帖木兒等、入通州、夜三鼓、元君及其后妃太子、開建德門、以其車服重寶、跳踰五日、遼進師、填濠入、陳兵登齊化門、執其監國、淮王帖木兒不花、居守太尉左丞相慶童、平章迭兒必失、朴賽因不花、右丞張康伯、御史中丞滿川等、數以奉職無狀、且先納款、此、等、作、用、三、代、以、下、未、兩、見、、此、等、作、用、三、代、以、下、未、兩、見、、封府庫、籍其圖書、金玉楮幣、以兵

千人守宮殿門使宮寺監護其宮人如主給餼廩無
缺吏士一切按堵市不易肆已遣指揮華雲龍經理
故都城垣右丞顯叅政友德平章曹良臣都督顧時
率驍騎偵邏隘口楊鎮撫以舟師守直沽捷聞詔
達與遇春定山西遇春以兵先下保定尋下河間下
真定而右副將軍宗異已定懷慶度太行取澤潞大
將軍帥大兵繼之使右丞顯叅政友德以鐵騎爲前
鋒略平定州而北時擴廓帖木兒兵方自保安謀踰
居庸關撼故都達聞之謂諸將曰擴廓兵遠出太原

必虛北平孫都督擁六衛之師足以抗禦我直抵太原覆其巢所謂批亢擣虛也太原下擴廓不戰潰矣諸將皆曰善遂以輕騎前抵太原而營擴廓還軍來救鋒銳甚副將軍與達計以步兵未集而輕與戰此危道也虜不解遠斥堠固營壘可掩而取達善之而會擴廓部將豁鼻馬者來約降請爲內應乃選精騎銜枚夜襲之擴廓方然燭使二童子挾書以侍卒聞警倉皇不知所爲跣一足乘驛馬以十八人走大同豁鼻馬降達次日建大將旗鼓按其營得甲卒四萬

馬四萬匹乘勝之大同擴廓遂走甘肅復遣顯友德以步騎徼破賀宗哲於石州而身率兵自霍下平陽河州府山西悉平遂渡河鄜城守將迎降克同州趣鹿臺時奉元爲都省而平章李思齊據鳳翔張思道與孔興脫列伯據鹿臺各有重兵以衛奉元思道等聞達兵至三日遁達遂進渡涇渭至三陵坡父老千餘人出迎達撫慰之遣左丞周凱入申約束明日師進奉元其約束如下故都時秦民大悅以奉元爲西安府副將軍兵逼鳳翔李思齊走臨洮鳳翔下達與

諸將議所攻，皆以張思道才不如李思齊，慶陽易於
臨洮，請先由幽州取慶陽，後度隴攻李思齊於臨洮。
達曰：不然。思道自守虜耳，城險而兵精，卒未易拔也。
臨洮北界河湟，西控羌夷，地富而人衆，以大兵感之，
思齊不走，絕徼則束手降矣。思齊降，全陝皆我有，遂
決策度隴，克秦州，走其將呂德、張義，至鞏昌，總帥汪
靈真、保平、章梁子、中商、鬲等降，遂遣馮將軍以天策
羽林諸衛驍騎逼臨洮，李思齊降，得其衆十餘萬，乃
以兵攻靖寧，走知院杜伯卜哈，度六盤山，襲走豫王。

盡獲其部落輜重，使使喻慶陽張思道懼，留其弟良臣以兵守，而從輕騎跳之寧夏。遇擴廓帖木兒爲所執，良臣聞之，使使納款，達遣右丞顯率騎士五千步卒六千往受降。良臣自疑以兵來者，豈捕誅我，乃佯爲蒲伏道左，獻牛酒，而夜襲顯，顯被傷走。達怒甚，卽日以大軍圍慶陽，而分布精騎使平章俞通源略其西，都督顧時略其北，叅政友德略其東，都督陳德略其南，慶陽援路絕，達進逼西門，其平章姚暉等開門納師，良臣父子自投井出而斬之，并誅其黨二百餘。

人陝西悉平。詔達還京師，第功宴諸功臣。以達爲首，稱其攻取山東、河南、燕冀、秦晉等處州郡，克敵致勝，振揚國威，撫綏軍民，得大將體，賜白金五百兩，文幣五十表裏，且大論封會，擴廓帖木兒覘達還，悉兵襲我蘭州，不克，尋敗我援師，殺指揮使于光，時左副將軍遇春卒。三年，上乃還達大將軍印，而以平章政事李文忠代遇春，分兵爲二。大將軍自潼關出西道，擣定西，以取擴廓。左副將軍自居庸出東道，從大漠取元嗣主，達受命，卽日行，遂至定西，擴廓退屯

車道峴達進師逼之駐沈兒峪隔深溝而壘擴廓發
精兵千人由間道從東山下潛劫東南壘舉軍皆驚
擾左丞胡德濟倉卒不知所措達自率帳前卒擊之
敵始退德濟故功臣越公大海子也達械之送京
師而斬其部下趙指揮數人以徇餘衆皆股栗明日
達乃整兵奪溝而戰以身先諸將士諸將士毋不奮
前角者遂大破之獲其郟王濟王閻國公平章韓札
兒虎林赤等文武僚屬千八百六十餘人士卒八萬
四千五百餘人馬萬五千三百匹橐駝羸驢牛羊以

鉅萬計擴廓脫身與妻子以十餘騎遁沮黃河得浮木以渡遂由寧夏奔和林德濟械至京帝釋之而以書諭達謂將軍自效衛青不斬蘇建獨不見穰苴之待莊賈乎將軍誅之則已不誅吾且念其信州諸暨功不得不曲赦以伸吾不忍自今而後將軍毋事姑息達既已破平擴廓乃使鄧將軍因兵威脇降西蕃而自攻興元復取之會左副將軍亦以兵襲應昌盡得元嗣主之嫡孫后妃將相寶玉士馬車服無筭先後露布聞詔振旅還京既至帝爲幸龍江勞

之所以慰賜有加授開國輔運推誠宣力武臣特進
光祿大夫左柱國太傅中書右丞相參軍國事進封
魏國公歲食祿五千石予誥及鐵券免三死子免二
死仍世世勿絕賚文綺帛百匹明年復佩大將軍印
填北平以便宜徙山後順寧等處軍民戶三萬五千
八百口一十九萬七千餘籍爲軍者給月廩爲民者
給田以耕通光、風、韓、重、准、管、中、田、北、邊、石、議、者、作、用、凡置屯二百五十四定墾田一千三百四
十三頃北平軍府之用皆賴之十二月受詔還京
師十餘日帝召達與曹國公李文忠宋國公馮勝

宴射。賜之交趾弓五十彤弓百。因諭之曰：古者諸侯有四夷功，賜之弓矢，天下甫息，苟得無，又有大興乎？旬日，帝御武樓，謂達曰：擴廓游魂尚出沒，奈何？達請曰：亟發兵坑豎子耳。度兵幾何？曰：十萬足矣。上曰：吾予爾十五萬騎。大將軍出中路，文忠以左副將軍出東路，勝以征西將軍出西路，將各五萬騎，轉餉私役者不與。達抵山西境，都督藍玉爲前鋒，敗其游騎於野馬川，復敗擴廓於土刺河。擴廓遁，與賀宗哲合，而拒我師於嶺北。時師數發，徧而易虜，驟與之。

戰不利，死者萬餘人。達固壘而收之，故徹侯功臣無死者，虜亦不敢入塞。而偏將軍湯和遇他虜於斷頭山，亦敗。左副將軍出塞，道遠乏水，後軍爲虜所掩，失徹侯曹良臣、大校數人，然得其士馬輜重，略相當。獨征西將軍與副將軍友德至西涼，屢破虜，盡收其妻子，以私匿馬馳故，賞不行。而上以達功大，弗問也。自是達連歲出填北平，歲行盡，卽召還。上將印賜休沐，以時宴見，懽飲，有兄弟稱，而達愈恟恟恭謹，嘗從容謂徐兄功大，未有寧止，欲以吾吳時舊邸居，若達

匡謝不敢，一日強沃以酒，既醉覆以被，昇臥邸正寢。達醒大驚，俯伏階下，呼死罪不已。上益悅，命有司爲治甲第，表其坊大功曰：令世世毋忘爾功。達長女尚燕王，王帝愛子也。國北平，故達歸將印不踰月，輒復之鎮。時北虜漸衰弱，而亦畏達威名，不敢復犯邊。達亦戒守邊者，唯繕城戍，簡士馬，謹烽堠，毋得徼功啓釁，故終達之鎮，北平十餘歲，兵民熙熙，有太平色。燕王三子皆達女，出親爲王舅。與天子夷輩而見，王必執臣禮，不少間。王以是心念

之。又得其用兵法，所練士皆精卒。胡惟庸爲左丞相，儉而貪，以達元勲貴重，因欲內好，達惡之，反賂達。闞者福壽使爲間，以圖達。福壽發之，達亦不問。惟時時爲上言，惟庸不可過委，過委必敗。後惟庸反，帝以是益重達。十七年，達在北平，疽發背，小愈。上使達子允恭視之，賜璽書，謂今九夷八蠻，大者畏力，小者懷德，非將軍何以臻此。且召之歸，而疾益甚。帝憂之，爲延致天下名醫，復禱於山川社稷，城隍之神，願假大將軍息數載，以寧萬姓。吾他日與之同往。

竟不起。十八年春三月卒。年五十四。帝袒跣奔達寢，撫屍而慟，愴然謂羣臣曰：大將軍爲朕股肱心膂，僇力行陣，東征西討，削平羣醜，克濟大勲。邇者太陰屢犯上將，萬里長城，一旦奪之，悲夫！盡心國家，爲社稷重者，寧復有大將軍。吾何以報！但著其勲烈，宣於金石，以永垂不朽。贈中山王，諡武寧。追封其三代皆中山王。而手書其混一區夏，奠安神人之功於墓道。且曰：婦女母所愛，財寶母所取，忠志無疵，昭明日月。惟大將軍一人而已。自躋灑。帝所授大將軍印，獨

宋國公勝涼國公藍玉而潁川侯友德以功進封公其受賑亦數然上待之不能如達諸所飭厲唯稱中山王或中山開平二王及燕王卽帝位所舉中山王以勵諸將軍者不一

弇州外史曰高帝之取天下計初下建康再與陳友諒角實在行而其他十七皆大將軍力也大將軍之廉靖仁武沈幾筴勝卽古名世之佐曷過焉勞而不伐夙夜匪懈與功名終蓋所以處君臣之際微矣元女侑配八英主整其成師於十五年後而資靖難

兩都二公光表後裔寵冠羣辟夫豈幸哉

開平忠武王鄂國常公

常遇春者濠之定遠人元末羣盜起盜魁劉聚得遇春而識之使爲什夫長有所攻剽遇春致力深入必尅獲而歸以是爲聚所愛重然遇春察其急鹵略毋遠志屬高皇帝駐兵和州乙未遇春偕其私卒數十來歸請願爲先鋒上曰爾以饑來歸且有故主在遇春頓首泣曰劉聚盜耳無能爲也倘得效犬馬之力某雖死猶生上猶弗許旣渡江抵采石元兵置陣磯上舟相去三丈餘遇春飛舸至上麾之應

聲挺戈躍而上敵皆披靡大兵乘之敗其衆遂乘勝
取太平始授總管府先鋒無何進爲總管丙申上
已渡江而諸將士家屬輜重皆在北滁和之守備單
弱元中丞蠻子海牙擁舟師數萬襲據采石界其中
音問絕上使遇春多張疑兵而自帥正兵直擣之
既合遇春別操輕舸以精兵橫衝海牙之舟分而爲
二左右縱擊大破之悉俘其精銳自是元師扼江之
勢衰而南北通矣遂從取集慶路再從徐達取鎮江
復爲領軍先鋒徐達攻常州而降卒叛與張士誠合

而圍達。命遇春以師援之，表裏共擊，大破士誠，復爲總管，進統軍大元帥。明年克常州，遷中興大元帥，尋從達下寧國，分兵取馬馱沙，遂取池州，戰功最進。行中書省都督，又明年擢都督馬步水軍大元帥。又明年從上取婺州，復有功，進鎮國上將軍，同僉書樞密院事，守婺州，遂以其兵攻衢州。衢州下，其院判張斌以卒萬人降，進僉樞密院事。庚子，召還京師，尋從達守池州，大破陳友諒之衆，友諒入寇，薄我於都城之龍灣。上設伏大破之，遇春功復最。上追

友諒於江州遇春留守用法嚴軍民肅斂辛丑進行
省參知政事復從上追友諒於安慶遂取江州還
督龍灣寨之師張士誠之大將李伯昇圍我長興急
上遣遇春以大軍援之兵至伯昇拔營遁俘斬其後
軍五千餘人壬寅城安慶破池州之叛卒羅友賢斬
之餘黨悉平上所任將帥其最著者三人曰平章
邵榮右丞徐達與遇春榮最爲宿舊且善戰旣貴而
驕有所不得志輒謀伏兵置酒要上飲而劫之事
發就縛上猶語諸將吾欲宥榮死以慰勞臣衆唯

唯遇春直前曰、人臣而以反名、寧可宥、臣誼不與之
共生、上乃飲榮酒、流涕而饗之、以是心益愛重、遇
春癸卯、張士誠別將呂珍圍劉福通於安豐、上救
之、師至而珍已破城殺劉福通矣、其兵勢盛而連營
水陸爲戰、守備甚嚴、時汪元帥爲前鋒、拔其中壘而
據之、會左右軍敗、汪元帥兵欲出走、阻於塹、則殊死
鬪、卒不可敗、而遇春以精騎橫突其脅、凡三合三勝、
大軍乘之、遂大勝、進圍安豐、元將左君弼自廬州來
救、達與遇春逆擊、大破之、遂移薄廬州、且下而友諒

傾其國兵來爭南昌。上乃趣達遇春廬州之師歸。遂從。上往救。遇於鄱陽湖之康郎山。達首敗其前鋒。縱火焚敵舟二十艘。殺獲以千計。而敵不退。友諒太尉張定邊奮前犯。上。上舟適膠淺。遇春從傍射定邊中之。始引退。上舟脫。而遇春舟復膠淺。乃復力戰以脫。明日復大戰。乘風縱火。焚其舟數十里。湖水盡赤。友諒弟友仁、友貴等皆焚死。連戰三日。友諒之卒死者過半。而我兵所亡失亦略相當。既出湖口。諸將佐氣稍稍奪。欲縱之去。遇春獨不言。上悟。

乃移舟扼上流而別出奇兵絕餉道凡旬五日友諒軍食乏其左右金吾將軍皆降友諒迫以百艘突圍湖口上躡之自晨至酉友諒中流矢死乃班師飲至策勲以遇春及廖永忠俞通海爲首賜土田金帛過當復從上討友諒之子理於武昌圍甫合而其丞相張必先自岳來援遇春以五千騎逆擊破擒之必先友諒驍將也甲辰陳理魄奪出降進遇春中書平章政事尋從徐達取廬州始別將兵略定臨江之沙坑麻嶺十洞牛皮等寨乙巳遂定贛州下南安南

雄韶州諸路師還取安陸襄陽丙午復從徐達克秦州巴克高郵徇淮安徐宿安豐悉下之丁未大發兵討張士誠命遇春仍副大將軍徐達行舟師出太湖擒其萬戶尹義等直趨湖州之崑山與士誠兵水陸鏖戰敵大潰遂薄其城飛車戰艦高與城堞埒其丞相士信掃境內兵來援築壘舊館壓我師之背遇春率奇兵由大全港入營於東阡却壓其背士信急抽精兵搏戰遇春鼓將士立破之復破其援兵赤龍船於烏鎮士信跳舊館之卒六萬悉降湖州下遂進圍

平江路，縛士誠以歸，藉其兵，得二十五萬。時上猶稱吳王，召見戟門，所以慰勞備至。進銀青榮祿大夫，上柱國，錄軍國重事，封鄂國公。上念遇春功大，欲尊貴之，而李善長、徐達已爲左右相，國不能復置相，乃以遇春爲平章軍國重事，制祿秩與相國等。復議討中原，遇春有所獻策，大較欲輕兵直擣其心腹，肢節當自解。上持重，不之用也，而心服其勇。至是，命遇春爲征虜副將軍，與大將軍達率步騎二十五萬，以北。上親禡旗於龍江，諭諸將當百萬之衆，摧鋒。

陷陣所嚮披靡無如副將軍遇春第吾不虞其不能戰虞其輕戰耳夫遇春大將也而好與一小校爭能甚非吾所望也遇春頓首拜詔既與大將軍合略定山東諸郡洪武元年遂破汴梁走其帥李景昌進攻河南元兵五萬陣洛水北將合遇春單騎突其陣敵以二十騎攢槊刺遇春發一矢殪當先者大呼而入麾下壯士從之遂盡殺其二十騎敵遂大潰河南下諸郡邑悉平五月上幸汴梁遇春馳入謁上勞之曰將軍與大軍北征不踰歲而下中原之半

功亦太矣。勞且倍矣。遇春頓首謝。上悅。三日辭。復往河南。遂與大將軍略定河北。進逼其大都。元主北走。遂移兵徇太原。元太傅河南王擴廓帖木兒自保安還師來援。其鋒銳甚。遇春與達謀夜劫之。擴廓果潰走。太原下。改遇春爲左副將軍。居右副將軍。馮宗異上二年取大同。轉徇河東西。渡關下奉元路。遂與宗異合。而西逼鳳翔。其平章李思齊率所部十餘萬衆奔臨洮。鳳翔下。會元丞相也速以兵寇通州。至白河而遁。上乃遣遇春以所部馳至故元都。部署將

士而浙江行省平章李文忠副之。遇春謀元主在開平，乃選步卒八萬，騎一萬，取道三河，經鹿兒嶺，抵惠州，敗其將江文清於錦川，獲士馬千計。次全寧，遂與也速遇，復敗之。進次大興州，遇春使分千騎爲八伏，微其歸。大興之守兵走，伏發，遂大敗，擒其丞相脫火赤，遂薄開平。元主已前走，追北數百里，俘其宗王三人，及平章鼎住等，斬之。凡得將士萬人，車萬輛，馬三千匹，牛五萬頭，子女貨寶稱是。師還，次柳河川，累得疾卒，年僅四十。上爲震動，喪車至龍江，親出奠。

爲文哭之、叙其功甚詳、已而大慟、始命有司、制聞大
臣計、用宋太宗爲韓王、趙普舉哀禮、擇葬地、鍾山之
陰、冥器芻靈凡九十、一切皆官給、不以煩其家、仍驛
書報大將軍、達使歸而會葬、特贈翊運、推誠、宣德、靖
遠功臣、開府儀同三司、上柱國、太保、中書右丞相、追
封開平王、諡忠武、復推恩王其三代、皆賜諡、明年論
功、賜金幣一、與大將軍等、而封子茂、鄭國公、歲祿三
千石、予誥券、配饗高帝廟庭、與祠雞籠山功臣廟、
皆次大將軍爲第二、王爲人沈鷺、果毅、撫士卒、與同

甘苦出則摧鋒退則殿後未嘗敗北雖不習書史而用兵決勝與古人合年差長於大將軍二歲數從征伐奉節制進止赴期不敢爽毫髮大將軍雅亦推愛之終始無小間唯性稍好殺而淫以此不能比大將軍而一時稱名將者猶曰徐常徐常云而上亦均重之晚節每舉以勵諸將帥必曰中山開平二王不偏廢也鄭國公茂弱冠而封其婦父爲宋國公馮勝以隸宋國公北征納哈出不奉約束削爵安置廣西之龍州然猶念遇春功別封次子昇爲開國公明年

加太子太保。建文末，以抗靖難師，安置雲南臨安。憂死。弘治中錄六王後，曾孫復得拜南京錦衣衛指揮使。嘉靖中繼絕世，乃更封懷遠侯。

鄭端簡曰：嘉靖十年進劉基侑饗。太廟并議常李

鄧湯四王後，十一年吏部會議，遇春、文忠、愈、和皆戮力中原，廓清方夏，曾不再傳，而子孫微替，歲月彌久，莫敢訟功，迨我孝宗憫焉。下詔錄其裔孫四人，爲錦衣衛指揮使。皇上神聖天啓，動遵祖法。特詔誠意伯劉基裔孫世爵，又推念四臣之功，俾悉

如基議從事廣祖宗崇德報功之仁修聖王興滅
繼絕之典臣等愚昧謂四臣宜世其爵制曰可封
常玄振懷遠侯李性臨淮侯鄧繼坤定遠侯湯紹宗
靈璧侯各食祿千石與世券
弇州外史曰封鄂而諡忠武唐之尉遲氏宋之岳氏
併開平而三

岐陽武靖王曹國李公

岐陽王李文忠，泗之盱眙人。父曰貞，母上之長姊也。生文忠甫十二而薨。時淮南北盜起，父貞携之東西走鋒鏑間，幾不能活。甲午聞上起兵滁陽，間關往投。至則相抱而哭。時皇子幼，上多蓄童穉之材勇者，子之使文忠冒國姓而從。皇姪文正列延師誨之，讀書史，習兵法。上嘗携所業，傳示幕僚曰：「平世一卿士也，雖然，要當於馬上習之。」丁酉，俾以舍人從軍，策應池州，奮擊破陳友諒之卒，驍勇爲諸軍

冠時年僅十九，無何以舍人率所部取青陽、石埭、旌德，皆下之。戊戌，敗元樞密院判阿魯灰於萬年街，遂敗苗軍于於潛、昌化，獲其婦女輜重甚夥。文忠以士飽飲且驕，夜潛殺所獲而焚其輜重，曰：「患不力戰耳，何患不富貴！」遂前襲破洪元帥營，降其衆千餘。己亥，會鄧愈、胡大海之師取嚴州，超爲帳前總制，親兵左副都指揮使，兼領元帥府事，鎮之。時嚴新下，城壘未固，而張士誠來爭，挾苗獠之衆，水陸數萬人奄至。辛丑，文忠以輕兵從陸逆擊，大破之，馘其首標之槎，放

之中流水兵見而夜遁遂克諸暨壬寅進浙江行中書省左丞苗將蔣英賊殺其帥叅政胡大海以叛文忠急擊破之蔣英走癸卯諸暨守將謝再興叛挾張士誠寇我東陽文忠馳救復破之再興走文忠以反側郡處兩叛間又與強虜接壤而練兵繕甲竝不可屈始文忠所築逼諸暨而城者曰新城士誠之司徒李伯昇悉兵二十萬來圍文忠救之令去城十里而軍守新城將胡德濟謂賊勢盛盍少避之以俟大軍文忠曰俟大軍城爲彼有矣將在謀不在衆遂誓師

而鼓之曰彼衆而囂我寡而整且聞彼之輜重山積
是天以富賜若也勉之戰既合文忠橫槊引鐵騎數
十乘高馳下直出賊陣斷其中堅縱橫搏擊所向草
靡賊駭亂相蹂躪大軍乘之城中守兵亦鼓噪而出
遂大潰斬首數萬級擒將校七百人委棄鎧仗芻粟
彌亘數十里伯昇僅以身免甲辰上召文忠歸宴
勞彌日賜名馬金幣甚厚乙巳進右丞使統全浙兵
攻張士誠之杭州丙午取桐廬新城富陽進攻餘杭
一夕而下叛將謝再興之五子降丁未杭帥潘原明

使其員外方彛納款文忠詰之曰兵未交而遽納款
得無爲緩師計乎彛謝曰王師所過秋毫無犯杭之
吏民鼓舞而慶有主自不能緩非敢緩也文忠於是
引入臥內與飲而授之約束明日原明如師師遂入
文忠營於麗譙下令曰敢有擅入民居者斬有一卒
下借民釜立磔以徇就軍中加榮祿大夫行省平章
政事還李姓洪武元年上卽位封文忠父貞恩親
侯食祿奉朝請上念姊已久死獨貞在而又醇謹
宴見不以時每有征行輒令守宮省文忠旣父子當

腹心寄親重無與比。尋討平閩之叛寇，還爲偏將軍。二年，從開平王遇春北討，由遵化度鹿兒嶺，進薄上都克之，走元君，獲其士馬萬計。俄而開平王卒，文忠代將，詔移兵陝西，與大將軍合而攻慶陽。行次大原，慶陽則已平，而虜東攻大同甚急。文忠曰：「兵可無西也。」援大同，便軍吏以爲疑。文忠按劍叱曰：「閩外之事，吾得而專之，敢言不援大同者，斬！」遂出鴈門，次馬邑，敗其邏騎數千，擒劉平章，進次白楊門，擒四大王。前軍已去虜五十里而營，文忠遽移之五里，前阻水。

自固、虜果夜率衆來劫我、不可動、質明文忠、望見虜
益大至、乃以二營委虜、俾死戰、久之、度其饑疲、乃選
精兵爲左右翼、奮擊、大破之、乘勝逐北、擒其驍將脫
列伯、俘斬及降者萬餘人、窮追至莽哥倉而還、論功
賜金幣、當大將軍之半、三年、進征虜左副將軍、與大
將軍分道北討、文忠以十萬人出野狐嶺、降其守將、
進師察罕、擒其平章祝真、謀知元順帝殂、太子
愛猷識里達臘卽位、其衆離、文忠喜、兼程而進、大破
其候騎、遂圍應昌、明日破之、太子走、獲皇孫買的里

八刺后妃宮人暨諸王省院達官將吏等駝馬牛羊
無筭并獲宋元玉璽金寶十五玉冊二鎮圭大圭玉
帶玉斧各一選精騎窮追至北慶州不及而還道興
州降其兵民三萬七千人至紅羅山又降其兵民萬
六千餘人捷聞上大悅爲御奉天門受羣臣朝賀
大封功臣文忠爲開國輔運推誠宣力武臣特進榮
祿大夫右柱國大都督府左都督曹國公同知軍國
事食祿三千石賜誥券世襲尋領都督府事四年西
蜀平命文忠因兵威拊循其地五年復以左副將

軍北討出東路師至哈刺莽來虜先遁文忠乃留輜
重驢駒河人齎二十日糧兼程進至土刺河元太師
哈刺章蠻子悉衆渡河留其妻子北嚮而嚴騎以待
文忠力戰却之逐北至騁海虜來益衆文忠乃據險
自固而多張疑兵以劫虜虜疑稍稍引去文忠亦解
而歸迷失道乏水渴死者甚衆文忠患之忽所乘馬
跑土泉隨湧出土馬賴以濟乃自爲文刑牲祭之文
忠軍雖名爲全而所失多得不足償而大將軍之出
中路者竟敗績矣六年將兵出朔州擒其太尉伯顏

不花七年總兵駐代縣分遣兵出至三不刺者俘其
平章陳安禮至順寧陽門者斬其知院珍珠驢至白
登者俘其國公鄧孛羅帖木兒又破大寧高州斬其
宗王朶朶失理皆鹵子女人畜歸虜益避遠邊竟無
事文忠與大將軍皆折節延諸儒生講說經義而文
忠尤號有文采上益雅重之始命與李善長通知
中書省大都督府事御史臺事又命大事皆取二公
處分中書省革命文忠特參軍國大計幾如大將軍
十六年命兼領國子監事十七年二月得疾上幸

勳、臣、而、有、文、者、一、人、而、已

其第撫摩久之揮涕而別卒年四十六贈岐陽王諡武靖父貞初亦封曹國公別食公祿前文忠卒亦贈隴西王諡恭獻有二子景隆增枝景隆少奉文忠教齒諸生間與天台方孝孺善既襲爵與魏國公輝祖等分鎮中原要地進掌左軍都督府加太子太傅上崩皇太孫立景隆益以肺腑見親任而增枝亦屢遷至左都督時兵部尚書齊泰太常卿黃子澄得幸夫却眼上謀削弱諸王故燕兵起齊泰黃子澄皆才景隆而薦之乃命景隆爲征虜大將軍北伐用裴度故

事賜通天犀帶。人主爲推輪親送之江滸。且令得
以一切便宜誅賞。時諸宿將鮮存者。雖存亦已老。又
皆景隆諸父行。怏怏不肯爲之下。景隆暴得意自尊
大。每升帳踞高坐。毋敢與抗禮。會兵五十萬。乘燕
王攻大寧。進薄北平。築壘九門爲長圍。欲以困燕
王。還師。景隆逆戰大敗。死者十餘萬。明日九門師潰。
死者復數萬。乃退走。王攻大同。景隆引兵出紫荆
關。時寒甚。士卒墮指。戰於白溝河北。凡三日。復大敗。
殺溺及被俘者。幾三十餘萬。景隆乃奔濟南。燕王

來追復大敗，死者二萬餘。濟南遂見圍，以叅政鐵鉉

堅守，得不下。始

人主未知敗，問與秦子澄謀，以景

隆權尚輕，

特賜黃鉞、金鉦、朱弓、矢，使者渡江而風

失之，複製以賜。而景隆敗，問至矣。召還，既陛見，黃

子澄慚憤極，執景隆於朝班，慟哭請誅，以謝天下。

人主莫能問也。又二載，燕兵渡江，駐龍潭。人主

懼，乃使景隆同尚書茹瑺都督王佐謁燕王，以割

地講和。請王笑曰：「事至此，何地可割？吾但欲得奸

臣耳。」於是景隆等蒲伏密輸款，歸佐谷。王守金川門。

一主事者，顛到乃尔，治亂存亡在所與謀，信矣。

燕王至景隆等開門奉逆。王卽位以景隆等默相事機。改號曰奉天靖難。階曰光祿大夫勲。曰左柱國。增祿歲一千石。其太子太師如故。賞埒淇成二公。改修高廟實錄爲監修總裁。諸裁定功賞大興革。景隆猶以班首主議。天子雖外示崇重而心恨之。諸功臣咸扼腕謂彼白刃判我而今以降虜踞我上其又明年刑部都察院大理寺臣論劾景隆包藏禍心蓄養亡命與其弟左都督增枝謀爲不軌。已文武大臣太子太傅成國公朱能等吏部尚書蹇義等復言

之已六科都給事中張信等復言之乃下詔盡削
景隆勲階官號絕朝請勒歸私第猶以長公主故不
奪其爵亡何羣臣復言詞事者至其家景隆猶坐受
閹人伏謁如君臣禮太不道復株及左都督增枝因
詔併奪增枝荊州帥符逮之與景隆同繫私第盡沒
其莊田寶貨圖籍滅獲入之官而所繫者皆親屬矣
管絕其食旬日不死始稍稍給食至永樂末而景隆
竟以凍餒卒正統中增枝猶在以恩例聽自便又數
傳而其玄孫璿爲南京錦衣衛指揮使卒子濂襲卒

子性襲嘉靖中繼六王後封臨淮侯勲號階祿同懷遠侯卒無子叔父沂嗣卒子庭竹嗣卒子言恭嗣好文學

弇州外史曰高帝起民間兄之子獨大都督文正姊之子獨岐陽王大都督不善居勲父子以廢徙而高帝念之不絕蓋二百餘年而南面猶故也臨淮之紹侯其亦高帝遺意哉

黔寧昭靖王西平侯沐公

沐英鳳陽定遠人。父母蚤亡。上收爲子。旣長。溫與有姿概。機穎過人。初與李岐陽等俱冒國姓。賜名文英。差次。皇從子文正數從。上征伐。入侍。帷幄。晝夜勤勵。目無迂視。上心器之。壬寅年十八。用爲帳前都尉。從守鎮江。居四歲。擢廣武衛親軍指揮使。加授昭勇大將軍。以所部從下福建。擒平章陳友定。洪武元年。歸其姓。沐而單名之曰英。擢鎮國將軍。三年。僉大都督府事。明年。進榮祿大夫。同知大都督府。

事時都督不爲階官而英特受上心膂托九年
命乘傳繇陝西巡行諸路布上恩惠事有不便者
輒更置而後聞且使練諸部兵以待明年遂副寧河
王征西番西渡黃河略烏思藏耀兵至於崑崙轉戰
數千里俘虜士卒萬計馬駝牛羊十倍師還而寧河
王道卒英代將其衆還京師封西平侯進號開國
輔運推誠宣力武臣勲柱國食祿二千五百石賜鐵
券又明年拜征西將軍窮追西番降元萬戶乞失迦
夷其部落擒洮州十八族番酋并其衆二萬餘雜畜

二十餘萬。平朶甘納兒七站地數千里。復率所部蕩
和林。轉略亦集乃。渡黃河。登賀蘭。擒伏聽者。得穹廬
所止。涉流沙。分兵四翼。薄其營。自率精騎衝中堅。大
破之。獲太帥國公脫火赤。知院赤愛足。覆其全部。十
四年。以所部從大將軍出古北口。襲公主山。長寨掩
四部卒。渡驢胸河。獲知院李宣。十五年。以征南右副
將軍。同潁川侯傅友德。永昌侯藍玉。下雲南。繇辰沅
出羅鬼。遂躡普安。至白石江。梁王把匝剌瓦爾密遣
其司徒達里麻。選用十萬來拒。潁川侯欲濟師。英以

諸軍嚴陣若渡者而奇兵潛從上游遶出賊後賊陣動大軍乘而擊之勁戰自旦至晡生縛達里麻賊大潰僵屍百里直抵雲南諸郡皆下獨大理猶爲元守英與永昌侯攻之擒段世拔大理移兵取車里平緬不浹月雲南郡邑悉平復與潁川侯分道平東川烏蠻寇而夷兵叛者合圍雲南守帥馮誠告急英簡萬騎馳救之賊夜遁乘勝急擊遂悉復曲靖永昌之失守者是年諸將班師詔英留鎮雲南英鎮之三歲平廣南蠻而破平摩沙勒斬首千餘級二十一年麓

川宣慰思倫發聚其衆三十萬來寇定遠英選卒三萬拒之馮誠領前軍竇正湯昭爲左右大戰左軍小却英令左右斬左軍帥首左帥逢見一人拔刀馳下卽麾衆復前英責戰益急不移時寇大敗明年復平東川破叛酋阿資入朝錫宴於奉天殿賚黃金二百兩白金五千兩綵幣百襲鈔五千錠陞辭上撫之曰使我高枕而無南顧憂者爾也英歸鎮二十三年復大破阿資衆走之二十四年使使以兵威折脅八百國并諸番有重譯貢者初英留鎮之明年哭

孝慈皇后再鎮之三年，哭懿文太子，極哀吐血卒。
年四十八，計聞上慟哭，命以喪歸，賜葬觀音山，追封黔寧王，諡昭靖，侑享太廟。有五子，其一子早卒，而三子遞鎮雲南。少子昕尚文皇帝公主，爲駙馬都尉，屢掌南京都督府，以壽考終。惠襄侯春者，英長子也。年少有才武，嗣英侯，繼填雲南，留意屯田水利，平緬甸、東川叛夷，復平越，馮阿資刀、千孟諸砦。三十一年卒。年三十六，諡惠襄，無子弟。晟以都督嗣，時岷王之國雲南與晟交惡，上貽書王，謂晟少孤，不練事。

毋深責之、吾當別飭晟、然卒以王他故、徙國楚、而晟自如、建文之自焚也、文皇意其匿晟所、使使調察無狀、乃已、麓川宣慰使不能制其下、諸蠻逐之、而擅其地、晟以大兵討之、分其地爲孟養、木邦、孟密三府、鎮沅、威遠二州、平涯、潞江、清甸、大侯者樂、五長官司、而歲徵其貢賦、又於潞江之西、置騰衝千戶、所以控之、夷遂帖息、八百國之長、使其獷帥以蠻衆來犯、晟發兵、使別將逆擊、而自倚其後、至蒙自、蠻退走、追獲其帥、賜璽書、宥以金幣、文皇四年、安南逆臣

黎胡查弒其君，并戕我使者，以晟爲征夷左副將軍，率雲南諸衛所土漢兵，由蒙自經野蒲，斬木通道，以入。前鋒奪猛烈棚華關，盜賊散走，造舟以濟師，分遣所部據澳沕寺沙，舁舟夜出洮水，步騎夾之，遂渡富良江，與征夷將軍新城侯輔兵合，破多邦城柵，繼擣其東西二都，及盤灘，困收櫓江仙侶等賊，胡查及其父僞上皇季犛狼狽棄其衆，獨携家屬及左右心腹遠遁，晟等窮追至日南州奇羅海口，擒獲無遺，得郡四十八，縣百八十六，凱旋入朝，論功，賜號顯忠輔

運推誠宣力武臣階特進榮祿大夫勳右柱國封黔國公歲祿三千石子孫世世勿絕賜誥券玉帶金幣寶鈔旣大宴上御製詩褒美之再宴於便殿還饋雲南無何胡奩之餘孽僞上皇簡定作亂命晟兼征夷將軍討之不利於是英國公輔復以征虜副將軍率兵合而破之獲定等檻送京師伏誅召英國還僞王陳季獮等尚未平晟連戰不能下又復命輔捕季獮等送京師晟亦受賞白金三十斤寶鏹三萬錠綵幣三十有副仁宗卽位召還宴勞賜金

幣加大傅還鎮自是 宣英二帝嗣位賞亦如是麓
川思任發反侵略騰衝南甸 詔諭之降不從晟使
都督方政等爲前鋒而大軍繼其後破平景罕等寨
斬首三千餘級獲象二十餘政恃勇以輕騎前搏賊
敗績死晟退師至金齒 詔還鎮內慚懼得疾至楚
雄而卒 詔官爲治葬賜祭追封定遠王諡忠敬晟
戰數不利 天子以絕遠且世將藉而隱焉滇人攝
服晟父子威信莊事之無異人主每片紙下土酋所
具威儀出郭迎迓盟而後啓曰此令旨也前後置圍

墅田業三百六十田，吾日食其一足矣。晟有子斌，斌尚幼，嗣公不能將其軍，於是晟弟昂以都督同知佩印代鎮，復討麓川不利。靖遠伯王驥等兵與合，始平之，昂得遷爲左都督，賜金幣加等，卒。贈定邊伯諡武襄，斌嗣公之。十一年薨，贈太傅，諡榮康。子琮，幼不克嗣，於是從兄璘以才舉爲右都督，代鎮。卒，弟瓚爲都督同知，復代鎮。前後凡十五年，而琮始嗣公。又明年始佩征南將軍印爲鎮守。前後平馬隆、麗江、劔川、順寧、羅雄等蠻，累賜敕褒獎。加太子太傅，嗣公凡三十

二年而卒，無子，以都督同知瓚之孫都指揮誠之子崑嗣。朝議以崑爲西平侯之裔，孫當從侯爵而守臣爭之，謂南人知黔國公不知有西平侯也。侯之恐爲所輕，崑十四歲而拜公，爵尋以征南將軍填守，發兵平龜山竹箐蠻，諭定孟養孟密之爭寨者，又合川貴二鎮兵，平米魯亂，再擒師宗州賊張長受，南安亂酋那代三賜璽書獎諭，再益歲祿百石，加太子太傅。嗣公二十四年卒，贈太師，諡莊襄。子紹勳，嗣公十六年而卒。子朝輔，嗣卅一年而卒。父子皆加太子太傅。

贈太傅二子融鞏皆甫襲而殤朝輔之弟朝弼當嗣
虐其嫂且錮之不使還南京於是上疏相訴久之始
得襲佩印填守其淫惡益甚且旅拒王命詔削
其爵以子昌祚嗣且代鎮而朝弼復欲殺其子逮至
京錮于南京之故第以幽死

弇州外史曰英以慎靜饒兵略爲天子筭路籃縷
以開滇土晟武則不競而德繼之世保赤社爲大明
藩屏偉矣

鄭端簡曰孝陵初起多畜養子每郡邑下輒遣養

子出守，蓋二十餘人，而昭靖王功最大。有徐司馬者，揚州人，九歲棄道傍，上得之，名馬兒。既長，出入侍左右，征行守禦有功，歷陞都督僉事、司馬。好文學，謙恭禮下，士大夫、浙東、河南尤著惠政。公暇，退居一室，蕭然如韋布。及卒，家無餘資，稱賢將。云：又有何文輝，滁人，初名道舍，守宣城、潼關、成都、北平、鴈門，從征淮東、姑蘇、福建、陝西、四川，尤有功。建寧時，建寧人降文輝，主帥胡廷瑞怒，欲屠其城，文輝力止之，曰：「吾與公奉命安百姓，乃以私忿殺人耶！」遂止。朱文遜者，從定

江左淮南有功授元帥拒漢兵戰死朱文剛初名柴
舍從定江左授元帥與耿再成守處州苗帥叛文剛
急收兵出戰揮劔斫賊大罵死文遜文剛未詳何許
人

寧河武順王衛國鄧公

寧河王鄧愈者泗州虹人父曰順興有三子長曰友隆仲卽愈元末羣盜起江淮順興從鄉皇少年據臨濠與元兵拒戰死友隆代之復病死愈復代之是時愈年僅十六衆頗少愈旣出戰則先登陷陣無所不摧破衆乃喜曰使仲君早將何至以首予敵會高帝駐師滁陽愈自盱眙率所部來附授管軍總管遂從渡江克采石取太平元將陳也先合蠻子海牙之兵凡數萬上禦之戰甫合而愈與徐達率奇兵繞

出其後大破之獲也先蠻子海牙走遂從下建康略定溧水破鎮江愈功最多擢廣興翼元帥克廣德州長鎗軍謝元帥來攻愈出輕兵背城戰走之俘其總管武世榮移鎮宣州別將兵取休寧績溪與胡大海合而攻下徽州走其將元之苗軍楊元帥以十萬衆來爭愈與大海分道逆戰虜其大校百五十八人婺源之裨帥汪同來降愈遣驍將王弼孫虎等進逼其城破殺其守將鐵木兒不花婺源下尋遣萬戶朱國寶狗下高河壘遂由昱嶺關進攻建德破其長鎗元

帥余子貞遂克建德以爲巖州進同僉行樞密院事
破元將苗楊之兵於烏龍嶺進僉書行樞密院事饒
州下愈入守數與陳友諒角有功進中書省叅政兼
總各翼軍馬愈乃廣布威德撫納降附以兵取浮
梁走其叅政侯邦佐轉戰樂平敗蕭總管之衆獲萬
戶彭壽等諸屬邑皆下遂進圖洪都駐師臨川之平
塘時吳宏旣歸上上因其兵使取撫州撫州帥鄧
克明欲與宏拒而畏愈強乃遣人詐獻地以緩我愈
訶得之卽率勁兵間道夜馳二百里黎明下其三門

克明單騎走傍邑，自度不免，乃以分省印及所掠撫州等四路、南豐等十八縣印，詣愈降。愈遂定撫州。於是上進兵取洪都，降其丞相胡廷瑞、平章祝宗、同僉康泰等，召愈以步兵來會。改江西行省，叅政填之，而命祝宗、康泰仍故官，以所部從。宗泰初不欲降，迫胡廷瑞意，怏怏不自得。又以愈秩卑，不欲爲之下，而廷瑞旣從，上還建康，從容爲言降故非宗泰意，恐有變時。右丞徐達方進攻楚，乃發使使宗泰等以所部從行舟次女兒港，遂謀叛，掠商舟布爲旗幟，夜趣

新城門舉礮破之而入。愈時倉卒，以數十騎走。數與賊遇，且戰且走。從騎被殺，且盡。愈窘甚，連跨三馬，馬輒踣，幾不免。最後得養子馬乘，乃得脫。奪撫州門，奔還建康，以情歸於上。上弗罪也。而撫之右丞達兵復洪都，走祝宗，而執康泰矣。於是大都督文正開府，洪都愈次焉。明年，陳友諒圍洪都，號五十萬，治戰艦，高與城等。文正約束將士，乘城守，而愈得撫州門，最爲要衝。愈晝夜不解甲者三月餘。上來援，大破其兵。射友諒殺之，圍始解。論功，與克敵等，尋破平鄧青。

等二萬人於永豐。從開平王遇春蕩臨江之沙坑麻嶺十洞諸山寨圍贛州下之。南安南雄韶州諸路悉降。進行省右丞尋進湖廣行省平章政事平章位次丞相而愈時年二十八兵興諸大將蚤貴無有如愈與李文忠者出鎮襄陽襄陽西接巴蜀南控楚北襟河洛烽火旌壘相望愈披荆棘立軍府營屯練卒威惠甚著。吳王初建御史臺首拜右御史大夫時左大夫湯和討方谷珍愈獨領臺事及大將軍經略中原而愈以征戍將軍略定江淮未附州郡進兵取唐

州又取南陽生獲守將蔡國公史克新等遂取隨州
守將左丞王誠降覆洪山之老馬劉寨斬獲以萬計
均房金商地悉平洪武元年帝卽位立東宮愈
兼太子右諭德三年以征虜左副將軍從大將軍出
隴右大破王保保於定西悉覆其衆別將招諭河州
土番大酋何鎖南普花兒只等請降其西烏思藏等
亦降皆入貢請受天子封師旋大論功封開國輔
運推誠宣力武臣特進榮祿大夫右柱國衛國公歲
祿三千石子鐵券子孫世襲五年以征南將軍討平

澧州等處溪洞蠻獠十年吐蕃諸部爲梗。刼剽烏思藏貢使輜重。愈以征西將軍率都督同知沐英等分兵爲三道深入其巢。窮追至崑崙山。斬首捕虜以萬計。鹵馬牛羊十餘萬。捷聞。上悅。使使召還。至壽春而卒。年四十一。上聞計。哭之慟。輟朝三日。喪車至三山門。親臨奠。行營視葬地。以故瑩隘。改卜於城南西山之原。葬事皆官給。追封寧河王。諡武順。是役也。都督英得封西平侯。愈爲人沈毅。詳敏。其事。上最恭慎。有所委。不憚危苦。功成不矜。敬禮賢士大夫。

上心重之命朱夢炎爲製神道碑五子而鎮襲改國
申亦數將兵從大將軍卒年三十三無子弟銘爲錦
衣衛指揮僉事有子源當後鎮而天永樂中子挺停
襲挺子炳弘治初復爲南京錦衣衛指揮使卒子繼
坤襲嘉靖初繼絕世封定遠侯勛號階祿視懷遠侯
卒子祖錫嗣卒世棟嗣

弁州外史曰愈之初以敢戰深入名亡幾而建方面
勳最多而不甚偉然汗馬者無寧歲矣僭爵上公帶
礪六王而以天死不獲終饗或謂高帝末功臣鮮

自保者、得天爲幸、是不然、以愈之忠順、勤勞、雖爲畢
萬可也、余游襄陽、襄陽人、至今稱衛國公、

東甌襄武王信國湯公

湯和字鼎臣濠人滁陽王之據濠也和從惡少年十餘人仗劍從是時高帝以王壻寄肺腑請於王與和共事和遂從帝取洪山寨復從下滁州取和州當是時諸將皆帝等夷莫肯爲下而和長帝三歲顧謹執部曲禮上甚悅從上渡江下采石定太平陳也先復來寇和擊其水軍流矢中左臂不爲撓尋與中山寧河二王自東門出甲轉戰至城北大破擒也先以獻別將下溧水復從平建業與中山王

取鎮江進統軍大元帥守之略定金壇覆窩莊戍轉
同僉樞密院事從取常州爲其守帥與張士誠境接
和頗好飲有酒過嘗請事於上上不獲允醉而有怨
言曰吾填常州如據坐舍脊左顧則左右顧則右誰
能難也上聞隱不發和醒亦大愧悔悉力拒士誠
再破其軍遂從中山王大破士誠於錫山僂其梟將
還拜中書左丞與中山王分省而治復回開平王解
長興圍大破士誠之僞丞相士信軍超拜平章政事
乙巳討平江西巨盜姚大膽取永新還守常州丙午

從中山王討士誠進略太湖降其舊館師轉戰湖州降其守帥張右丞復降其吳江州將遂圍姑蘇凡九閱月而後下上召見戟門論功賜帛九有副上卽大位始建御史臺爲左御史大夫立東宮爲太子左諭德時方谷珍猶據溫台慶元三郡未下和以兵討而感之悉得其衆以降遂移兵取福州時洪武元年也陳友定猶爲元守建寧城險兵勁和以征南將軍率諸將攻下建寧虜友定以歸是歲扈上幸汴梁遂同宋國公馮勝取懷慶澤潞晉絳諸郡三年

從中山王拔河中、渡河入潼關、趣鳳翔、越六盤山、秦隴皆蕩平、明年復從中山王大破元丞相擴廓帖木兒於定西、遂定寧夏、追虜於察罕腦兒、虜其猛將虎陳、是年九月大封賞功臣、與衛公鄧愈俱爲御史大夫、以功不如、僅封中山侯、爲開國輔運、推誠宣力、武臣榮祿大夫、柱國、歲祿千五百石、始露其守常州時語、和惟頓首謝過而已、明年爲征西將軍、與副將軍廖永忠等、以舟師自夷陵入峽、攻夏、扼險、不得進、永忠趣之、和不決、而征虜副將軍潁川侯友德自秦隴

深入取漢中，永忠乃決計先入，破其扼險之師。長驅抵重慶，夏主明昇以重慶降，而友德亦定成都、蜀平。天子推功，友德永忠受上賞，責數和逗撓，而姑予之彩帛八，和復頓首謝罪。又明年，和以偏將軍從中山王北討，分道擊賊，戰於斷頭山，敗績，失徹侯。一人久之，進濠州爲中都鳳陽府，命和與太師李善長於其地建宮闕，分置曹署，以久勞於外，數賜璽書慰勞。尋甃通州之外郭。八年，徙鎮彰德，甃其城。上以和用兵數失利，不任將，而堅忍多智數，又能與太師

善長抗故時委以綜理之任輒効且念其爲里閭長者十年竟封和爲特進光祿大夫左柱國信國公議軍國重事歲食祿三千石與誥券明年同曹國公練卒中都西巡至河州繕完其城廓營舍十四年從中山王北伐覆灰山營獲其平章刺里哥樞密副使九通又明年巡四川永寧之墉濠訓練其士馬十八年五開山獠亂和以兵討之夷其穴鹵斬四萬餘時中山岐陽二王皆已物故上念天下無事不欲諸大將屢典兵而和從容爲上言臣老不敢稱豈獨願

得歸故鄉爲容棺之墟以待盡。上大悅，立賜寶鈔

五萬錠，治第於中都，尋悉爲諸功臣魏、鄂、曹、宋、潁、涼諸國公、徹侯治第，皆極宏壯。旣而謂和曰：「日本蕞爾夷，數爲侵盜，我欲固我封戍，卿雖老強，爲一行於是我，和行視山東、登萊、淮揚、吳越、閩嶺、濱海要害，築城凡數十，民取一丁爲兵戍之。」和竣事而新第成，和率妻子陛辭，賚黃金三百兩，白金二千兩，鈔三千錠，綵幣四十有副，又賚其夫人黃金二百兩，白金一千兩，鈔五百錠，綵幣三十有副，夫婦皆賜。壘書褒諭，其又

明年魏曹等六公還鄉，賜皆如信公，而夫人不與焉。自是和與諸公侯歲一朝。京師朝必有宴賞，及道里費，而諸公侯猶不時遣鎮各邊，及將兵討伐，獨和以老不在行，而上愈信愛之。二十三年入朝，忽病中風，不能言。上聞卽幸其第，撫視惋歎良久，遣還里。二十七年，上思王使其子前軍都督僉事鼎迎至都，俾以安車入內殿，與酣宴而出，賚金帛御膳，法酒相屬，最後復大朝，疾寢劇，不能興。上復令以安車入內，手摩撫其體，與叙里閤舊，及艱難勞勩，和不

能對稽首而已。上爲之雪涕，出藏鏹，付有司爲營葬地。明年卒，年七十，追封東甌王，諡襄武。和有五子，亦前卒，而少子醴積伐至同知左軍都督府，征五開道卒於軍，有孫十一人，弗及嗣。六世孫紹宗，孝宗朝錄功臣後，爲南京錦衣衛指揮使。嘉靖中，繼絕世，封靈璧侯。凡三歲而卒，佑賢嗣。卒，子世隆嗣，領漕事者十餘年，以勞加少保、太子太保。

弇州外史曰：以湯信公之戰伐，其績何寥寥也。一逗撓，一不利，毗陵酒語，至煩不廷訓，而其後乃爵上公。

贈真王便蕃之錫，諸勛舊不敢望焉。顯融令終美哉，乞骸一語基之矣。夫以絳侯勃之定策，有社稷勲而煩人主詔，乃怏怏之國，彼其君臣俱失之也。余嘗按行登萊海上，及宦游吳越間，其父老歷歷指烽戍云：湯信公功不可磨滅，微信公吾其鯨鯢食矣。嗟乎，高皇之善器使人也如此。